

## Communicaziun a las medias

### Ladina Heimgartner daventa nova directura da RTR

Cuira, ils 03-04-2014 - **Sin proposta da la suprastanza regiunala da la SRG.R ha il cussegl d'administraziun da la SRG SSR elegì Ladina Heimgartner sco nova directura da RTR Radiotelevisun Svizra Rumantscha. La Grischuna maina actualmain la partizun Martgads e qualitat da la direcziun generala da la SRG SSR a Berna. Avant è ella stada manadra da ressort e substituta dal schefredactur RTR a Cuira.**



*Ladina Heimgartner daventa nova directura da RTR*

Ladina Heimgartner è naschida il 1. da matg 1980 a Scuol nua ch'ella ha era visità la scola. Suenter la matura a l'Institut Otalpin a Ftan ha ella fatg il studi da germanistica e litteratura rumantscha a l'Universitad da Fribourg. Ella ha terminà quel cun il licenziat lic. phil. I en germanistica e rumantsch. Durant il studi è ella stada collavuratura libra tar las «Freiburger Nachrichten», da 2001–2006 collavuratura dal «Bündner Tagblatt» e là dal 2006–2007 manadra dal ressort cultura. Il 2007 cumenza Heimgartner sia carriera tar la SRG SSR: Ella daventa redactura dal Radio Rumantsch. Gia suenter in onn è ella manadra dal ressort «Reflexiun».

En quella funcziun è ella responsabla per las emissiuns emnillas da RTR, tranter quellas «Cuntrasts», «La Marella» e «Profil». Ella è era stada participada decisivamain al svilup da l'emissiun d'uffants e giuvenils «Minisguard». Da 2010 fin 2011 è Heimgartner ultra da quai era stada substituta dal schefredactur RTR.

Il 2011 mida ella en la direcziun generala da la SRG SSR a Berna, nua ch'ella installescha l'emprim la nova partizun Martgads e qualitat, la quala ella maina silsuenter durant traís onns.

Suenter la nominaziun da l'actual directur RTR Mariano Tschuor en la direcziun generala a Berna ha la suprastanza regiunala da la SRG.R instradà immediat la procedura per reglar sia successiun. Sin la publicaziun da la piazza èn s'annunziadas pliras candidatas e candidats qualifitgads. Silsuenter ha la suprastanza regiunala da la SRG.R instradà la procedura da selecziun: il comité d'elecziun ha lura fatg ina emprima schelta; ultra da quai han plirs candidats participà ad in assessment extern. Finalmain ha la suprastanza regiunala da la SRG.R elegì unanimamain Ladina Heimgartner e proponì ella per l'elecziun sco nova directura RTR al cussegli d'administraziun da la SRG SSR. Quel ha approvà ils 2 d'avrigl 2014 la proposta ed ha elegì Ladina Heimgartner sco directura da RTR. Ladina Heimgartner surpiglia il post da Mariano Tschuor il 1. d'avust 2014. Sco directura da RTR è Ladina Heimgartner era commembra da la direcziun generala da la SRG SSR.

La suprastanza regiunala da la SRG.R sa legra da l'elecziun e giavischa a Ladina Heimgartner bler success e satisfacziun en ses uffizi.

Oscar Knapp, president SRG.R

**Dapli infurmaziuns:**

Dumondas da las medias vegnan coordinadas dad **Esther Bigliel**  
(079 579 89 90 | [esther.bigliel@rtr.ch](mailto:esther.bigliel@rtr.ch)) e respundidas d'Oscar Knapp